

## **PN sei Inisia Kriasaun Lei Cybercrime, MJ Asilera Kriminaliza Difamasaun**

*Tempo Timor*, 2 Julhu 2020

Tempotimor (Dili)-Komisaun E Parlamentu Nasionál ne'ebé trata asuntu infra-estrutura, iha ona hanoin atu halo koordenasaun ho Ministériu Transporte no Komunikaun hodi kria lei cybercrime atu bele regulariza media sosial.

Tuir Prezidente Komisaun E Abel Pires hatete, durante ne'e mosu identidade (ID) falsu iha Facebook ne'ebé gosta insultu, tolok, no falsifika informasaun hasoru lider istoriku sira.

"Ha'u hanesan prezidente komisaun E, Infra-estrutura, haree katak Timor-Leste presiza duni lei tranzasaun elektróniku no Cybercrime tanba depois de ita akonpaña, kuaze ema barak mak halo ID falsu hodi insulta, tolok, hatún lider sira-nia dignidade, buat sira ne'e mak PN sei koordena ho MTK atu bele haree kestaun ida ne'e," dehan Abel Pires iha Parlamentu Nasionál, Kinta (02/07).

Abel dehan, molok ne'e nia parte konfirma ona ho parte governu, no governu mós aseita ba kriasaun cybercrime.

Iha parte seluk, antes ne'e Ministéiru Justica iha VIII Governu Konstitusional, Manuel Carceres da Costa dehan sei avansa ba oin ho nia proposta atu halo alterasaun ba lei kodiku prosesu penal hodi kriminaliza difamasaun.

"Governu simu preokupasaun mais Estadu la'o ba oin, labele hakiduk ba kotuk no labele para", dehan Carceres hafoin reuniaun Konsellu Ministru, iha palasiu governu, Kuarta (01/07).

Tuir ministru ne'e, esbosu Lei Kriminaliza Defamasaun difine klaru ona, no presiza de'it halo esplikaun.

"Define ona, agora presiza esplikaun koreta kona-ba saida mak difamasaun, tolok no kritika," dehan nia.

Tuir Asesor prinispal Timoroan ida iha Ministéiru da Justica dehan ba Tempo Timor katak kriminalizasaun difamasaun ne'e la'os sira nia prioridade no tuir nia katak drft kriminalizasaun difamasaun ne'e la tama iha sira nia prioridade 'fora area de cobertura ne'ebe derepente de'it."